

衢州文獻集成

〔史部〕

第
36
冊

衢州文獻集成

黃靈庚

諸葛慧艷

主編

〔史部〕

第
36
冊

國家圖書館出版社

第三六冊目錄

〔康熙〕西安縣志十二卷（卷八至十一藝文志・碑記）

（清）陳鵬年修（清）徐之凱等纂 清康熙三十九年（1700）刻本

.....

西安縣志卷之八

祠祀志

易大傳曰聖人以神道設教而天下服此非徒以福善禍淫之說聳動愚民也蓋聖人臨祭齋明之德洋溢充滿發爲莊敬誠懇之象而節之以禮陶之以樂可使幽明上下合爲一致以是齊心志于國中昭典禮于天下所謂下觀而化也雖然福善禍淫皆天地間一誠之所爲其理不可易其功用自不可揜是故崇其廟貌盛其牢醴以使人警省

而潛革其非心是亦化導之微權也至于無鄉之
黍肉易代之几筵亦莫不有靈爽存焉盡禮致敬
以交于神明此人治之太者亦不可以不講也作
祠祀志

秩祀

秩祀者祀事之通乎方州而稟乎常伯者也守土
者以是交乎神明所謂國之大事也凡資其益者
必有以報之致其情者必有以將之報非有冀于
我者也將非有藉于文者也自盡之道也作秩祀

志

社稷壇在縣治西北門之間中爲壇有門有庫有廚有齋所春秋仲月上丁釋菜之明日上戊出主于壇而祭之知縣具祭服帥僚屬隨府行禮

風雲雷雨山川壇在縣治南門外中爲壇有門有庫有廚有齋所春秋仲月或與社稷壇同日或繼社稷壇于上戊之明日出主請城隍之主于壇而合祭之知縣具祭服帥僚屬隨府行禮

按歲序冬藏土復其元穀落其實易大傳艮者萬

物之所成終而所成始也艮位爲西北故祭社稷
于其方祭之于其所歸也風雨露雷皆陰氣凝結
而成山川者其所從出也陽生陰殺故祭之南方
欲其有益于生氣也祭之于其所勝也西安自西
北而南可五六里若兼祭則抵南壇已近輔故往
往兼用戊巳分祭焉戊巳于十干爲中中央土也
漢有戊巳校尉主屯田土功是其證也

郡厲壇在城北拱辰門外一里內設壇設告文碑外
設垣壇之外有齋所歲三月清明七月望十月初

請城隍之神主其壇祀無祀鬼神而分祭之用羊豕襍設湯餅羹飯如制在經費亦名三小祭知縣具常服帥僚屬隨府行禮其祝無文卽用明太祖時禮部行布政司牒移創設厲祭文雖襍用椽史科條而其文渾樸醇雅有典謨訓誥氣象以郡邑通行故不載

府城隍廟在府南面城坐龜峯之首宋紹興年建歷乾道淳熙屢加修繕淳祐十年加封號康濟侯元泰定乙丑郡守赫斯更修之侍郎鄧文原撰記

元至正初總管張士俊重修歷久傾圯明洪武辛未
張士良守衢承制建造一時草創頗湫隘弗稱以
治庚戌太守張俊擴而新之外爲門三楹爲庭除
墼級中爲正殿五間爲中庭四楹後爲寢殿三間
堂之東西兩行爲侍史從者皆各塑像執事威儀
翼如也東西廡十二司像極端嚴有碑亭有齋所
廟制始鉅麗改觀教諭胡昱撰記
明嘉靖壬戌寢廟圯太守楊公準同知薛公應元通
判張公澤推官任公秀各捐俸新廟重建寢殿

明崇禎壬申秋廟門前殿燬署府事楊公助修勸募
癸酉秋告成

皇清康熙九年庚戌郡守雷公經重修各官紳士民
捐助者立碑記其姓氏

康熙己巳大雨雹棟宇毀折郡守董公弘毅倡修里
民樂于從事修葺如故鄉紳徐之凱撰募文

康熙戊寅郡守張公濬捐俸復修爲官紳倡廟貌垣
墉有加于昔

城隍廟之左舊有三官堂年久傾圯明天啟三年郡

守林公給印簿道士余惟偉居民鄭一奇募金重建正殿三楹左建土地祠三楹住持房五間鄉紳葉秉敬撰募文

按郡城隍今稱勅封康濟侯亦不知何代所封也西安以神惟神靈爽最赫亦惟神香火獨盛自明壬午以穿窬斲像著靈異一時閭閻于清明日因神出厲壇競爲社會各裝飾旌旗甲冑劍鉞纓珮之屬文以今古故事小說詭譎妖麗璀璨耀日月翠凝雲金鼓之聲旃檀之氣填溢耳目一城奔走

若狂遂沿爲成例然此時物力匱詘視曩時亦少
衰矣考之楚詞若孔蓋翠旌長劍少艾則婆婆樂
神亦自古有之惟近見主祠事者設爲科約條教
排衙署牘一如大吏治事狀甚至暑月乃張一簋
納神檻中則狎矣毋亦禁其屑越而相安于渾穆
之天其可也

西安縣城隍廟在縣南五十步醋坊巷面南北前
爲正殿三楹塑像後爲後殿三間又後爲寢室三
間邑人鄭大經有記

按記謂神爲呂氏諱應徵漢宣帝時西安人舊傳有宣帝封信安城隍仁祐伯及夫人裴氏二誥勅其時爲五鳳三年四月今尚在據此則年月姓氏歷歷可考其爲呂公無疑第漢時未有誥勅今勅文皆儻句亦非漢文明矣今邑人相傳呂公有漢宋重封則此當是宋時誥勅也至信安在秦漢時皆爲縣唐始立衢州治宋因之明初陞爲府而以西安附之蓋當其爲縣時原有城隍廟及建府卽就舊廟立祀而後遂以所祀城隍爲府故縣城隍

無專廟明隆慶五年邑令梁公問孟以縣不立廟
終係缺典捐俸修造縣之有城隍自此始考之趙
中丞鎰郡志中無西安城隍良以此也詳具大僕
卿鄭大經記中

明萬曆四十三年縣令俞琬綸改造時舊廟湫隘門
制未立居民孔承遷余洞潘孔禮鄭一贊倡義首
工不費官帑重建大門邑紳葉秉敬贊成之鄭一
卿撰記

皇清康熙戊寅邑侯湘潭陳公鵬年以廟宇歷久剝

蝕捐俸重修由殿至門體制一新

星躍

文昌祠在城隍廟之右爲廟三楹有廡有門以城隍之西掖門爲大門與城隍同廟異室歲以二月二日八月二日士人會集舉祠焉舊西安學門有魁星閣樓觀軒翥頗足妥侑神靈以甲寅亂藎廢無存康熙戊寅邑令湘潭陳公鵬年邑司鐸王公欽捐卽其地建大樓五楹爲文昌閣位文昌于中而旁立魁星像并祀焉前臨翠岫俯瞰澄澗亦人文

萃美之區一邑登臨之勝也舊邑學東饒公祠後
有文昌閣樓觀弘敞亦以甲寅毀廢城西北鐵塔
一下小文昌閣乃西隅諸人士所建近始落成亦頗
有水木之勝然視此則已隘矣

魁星閣舊在西安縣學門樓上樓僅一楹在文廟東
南今廢其址新構文昌閣見上

火德祠舊在府城隍廟側明崇禎壬午郡守張公文
達以西安數有火災移拱辰門外三里臨浮石渡
歲三月十五八月十五日邑令具祭服率僚屬祭

爲其舊祠今爲文昌祠

按天官家言文昌居斗魁上戴筐者六星爲上將次將貴相司命司中司祿天之貴神也是宜總軍師之任不應言其專主文事蓋後世以文章取爵祿而星有司祿之名故群然敬而奉焉然奉之既專則居之宜得其所此非如青鳥家言也卽以人事推之人有一畝之宮環堵之室宴如也俄有人爲實偪處此則跼蹐而不寧俄有尊貴之人掣其肘掖而睥睨之則更擾攘而失措莊子曰室無